

# No Servus, Diener und Habe die Ehre!

Etze kummt dos

## Nej su wos

vu Sömde, n 27. August 2022



Martha (Martl) Jung

---

### Vu dr Jagerei

Ich ho mit dr Johd eigentlich nischt zu tun, ich hotte ou nie enn Freund, dar de dr Jagerei gefrönt hätte. Mei Votr wor Töschler, und wor vun Sunneufgiehn bös meist om neune oubds ei dr Warkstott, hotte also kejne Zeit und ou kej Gald fr su a tojeres Hobby. Mei Mon mochte ou nischt vun Viecher-Ömbrengn wössn. A mejnte ömmer, wie kon mr denn of su a wunderschienes Tier, wie Hörsche und Riehe sein, zieln und se drschissn.

Ganz andersch sane beidn Onkl. Ei Hermannsthal wor a jungr Pforr, dar de eigentlich Förschter hotte wolln warn, dar hottes sehr mit dr Johd. Es worn jo frieher ei olln Dörfen Johdgebiete, die entweder vu dr Gemeinde verpacht wurn, odr - wens ganz grusse Grundbesitzer worn wie dr Förscht Rohan - die totn dann ou ane Johd vrpachtn.

Ei Hermannsthal hotte s ou su a poor begeisterte Sunntichsjaiger, und dou wor besochter Pforr ömmer mit vu dr Portie. Unsr Onkl und enner vu senn Nimrodbriedern - a Bäcke - die hon sich ganze Nächte öm de Uhrn geschlohn, wenn se of wos wortn totn. Wenn s fr dan Bäckn Zeit wur hejnzukumm, dou nohm seine Froue s Feuerwehrohrl und machte zwej- drei Moul en Stuss nei. Dos hiess frn Bäckn "hejm kumm!". De Leute wolltn jo frieh de Sammeln hon. Alsdann hout sich ei Hermannsthal niemand sehr dro gestiirt, wenn ei dr Nacht Feuer geblousn wure.

Dar andere Onkl, a ogeheiroter Biehm, wor ou su a drpichter Sunntichsjaiger. De Deutschen hon jo olle Woffn, natierlich ou de Johdgewehre, obgahn missn, Dou brauchtn sich de Biehm ock om Vybore zweje, dreie aussuchn und komm böllich drzune. Man Mons sei Onkl, a Hundling (wie olle Biehm), hotte mit san Huhnstöckln ou vur senn Johdkollegn ne Halt gemacht: Ejmoul hotte a enn Neulinge ufgegahn, a selle mit zwej Flintn Sunntich frieh ö m dreie ei dr Gablunze sein, se welltn sich dorte olle zur Fuchs johd traffn. S wor a ejn Water, Schniepontsche und nosskaalt, obr dos macht jo enn röchtschn Jaiger nischt aus. Dr Onkl mejnte, a wiere mitn Motorradl anouch kumm. Dar orme Karl hotte sich ei olln Watr mit dan zwej Flintn of Gablunz ufgemacht. Natierlich wor niemand dorte om aln Morte, s wor nämlich dr orschte April. Dou hout a n Rache geschwurn.

Wiedr amoul hotte sich die ganze Blouse nouch dr Johd ei dr Mosesquelle getroffn. Dar biehmsche Onkl mejnte, a wiere dos geschossne Rieh mit zu sich hejmnahm, und morne selltn se kumm zun Ufftejn, ha hätte en grussn Rucksack und s Motorradl drbeine, dou tets n nischt ausmachn. Obr se hottn ihm seine Tummejungnstöckl ne vrgassn, und mr wejss ne, hottn se n Bier ei n Benzintank geschutt oder ju amende gor neigepieslt. Jednfolls - dos Ludermotorradl gob kenn Toun vu sich, ha konnte machn, wos a wollte. Die andern worn schun gegangen, und nu musst ha s Motorradl schiebn und dan schwern Rucksack ou noch trohn. **Dan** Hejmwajg dorch n Puusch word a wull ne glei vrgassn hon. Mejt dr ne ou?

---